

TRICINTINARIU

# PASQUALE PAOLI

1725  
2025



Scupriti comu issu influenzadori di i  
tempi muderni hà datu forma à  
l'identità corsa è suminatu i graneddi  
di a dimucrazia beddu nanzu l'ora.



# U BABBU DI A PATRIA HÀ 300 ANNI !

---

1725

---

**Nascita** di Pasquale Paoli, figura emblematica di a stodia di Corsica, chì a lascita ribomba sempri dopu à 300 anni.

---

## Custruzioni di un mitu



À l'uccasioni u tricintinariu di a nascita di Pasquale Paoli, u 2025 prumetti di essa una annata zeppa in publicazioni è avvinimenti dedicati à a mimoria di issu parsunaghju di primura in a stodia di Corsica.

S'è Paoli t'hà pochi leii diretti cù a noscia righjoni, a cumuna di Figari hà vultutu quantunqua participà à fà cunnoscia meddu a vita è l'opara di sta figura emblematica di a stodia isulana, purtata da u spiritu di i Lumi.

Tandu, u scopu di stu librettu pidagogicu hè di dà à unghjunu **a vodda di andà più in là**, micca solu in a cunniscenza di a stodia, ma ancu in quidda di a lingua è di a cultura corsa.

U mitu di Pasquale Paoli nasci à a fini di u XVIII<sup>esimu</sup> seculu, quandu iddu, vintu da i truppi di Luigi XV, hè custrintu à l'esiliu. Ghjirendu par l'Europa nanzu di stallà si in Gran Brittagna, diventa l'omu di i Lumi.

È puri, hè à u XIX<sup>esimu</sup> seculu chì apparisci a maghjina d'un eroi romanticu è chì a figura di Paoli si trasfurmighja in un mutivu cintrali in l'affirmazioni di una identità corsa fundata nantu à l'arti.

Hè stu mitu chì ferma tandu in l'imaghjinariu cullittivu isulanu.



## A lascita paolina

S'è Paoli hè un parsunaghju di primura pà i Corsi, l'omu hè menu cunnosciutu è ancu di menu apprizzatu in Cuntinenti, induva hè vistu storiograficamente com'è l'upponenti à a causa francesi è com'è u capu d'un « Statu corsu » pruclamatu da u 1755 à u 1769 ; vali à di da a vighjlia di a guerra di i Setti Anni (1756-1763) sinu à a so scunfitta à a battaglia di Ponte Novu.

In altrò in u mondu, supra à tuttu in Inghilterra, ma dinò in i Stati Uniti – induva sei o setti cità portani u so nomi – Paoli hè vistu com'è un omu maiori.



---

## 1739

---

**Esiliu in Napuli**, dopu à a disfatta di a rivolta contr' à a duminazioni ghjinuvesa. Pasquale t'ha 14 anni.

---

## O ghjuventù passata...

**1725 - u 6 d'aprili** Pasquale Paoli **nasci in Stretta**, in a cumuna di Merusaglia, in Castagniccia. Hè u più ghjovanu di i sei fiddoli di Ghjacintu Paoli è di Diunisia Valentini.

**1731** Ghjacintu Paoli, chì ùn era micca à prò à l'urighjini, participighja à a rivolta contr' à a duminazioni ghjinuvesa.

**1735 - l'8 di ghjinnaghju** **Consulta d'Orezza** Si urganizighja meddu a rivolta contr' à Ghjenuva è i ribeddi si dani un governu pruvisoriu, cunduttu da Paoli, Giafferi è Ceccaldi eletti primati di u regnu, cù u titulu d'Excellenza. Hè à st'uccasioni chì u **Dio vi salvi Regina** diventa l'innu di a Corsica indipendenti.

**1736 - marzu** Una flotta guidata da **Tiadoru di Neuhoff**, suldatu è avventurieru urighjinariu di Westfalia, sinsibuli à i prublemi di l'isula, sbarca in Aleria. Riesci à cunvincia i capi di a rivolta ch'iddu t'ha sustegni par aiutà a Corsica in a so ricerca d'indipendenza.

**U 15 d'aprili** Hè elettu rè di Corsica da i partigiani corsi. Hè l'iniziu di u regnu effimeru di Corsica. Una **Custituzioni** hè aduttata è un governu di trè membri hè istituitu cù Luigi Giafferi, Ghjacintu Paoli è Sebastianu Costa. Ùn avendu aiutu, u regnu dura solu pochi mesi.

**1739** Quand'iddu t'ha solu 14 anni, Pasquale è u so babbu partini in esiliu versu Napuli, dopu à a scunfitta di a rivolta contr' à i Ghjinuvesi. Si ritrova in un mondu induva l'idei di

i Lumi cuminciani à spuntà. U ghjovanu Paoli si nutrisce tandu di l'idei progressisti di l'epica.

**1745-49** In l'Accademia napoletana, Pasquale studiighja i scenzi, a filusufia è a litteratura. Più tardi, sarà particularmenti influenzatu da l'opari di i **filusofi di i Lumi**, com'è Montesquieu è Rousseau, ma dinò da i scritti di **Machiavel**.

Duranti a so aduliscenza, Paoli sviluppihja una bedda maestria di i lingui, ciò chì li apri i porti di i riflissioni auropei. Sta aducazioni li arricchighja un stintu puliticu, marcatu da una forti aspirazioni pà a ghjustizia suciali è a libertà.

# A SO STODIA IN A STODIA



**1745 - di austu** L'insurretti contr'à Ghjenuva s'adduniscini in cunsulta in a pievi d'Orezza.

**1753 - u 2 d'uttrovu** Ghjenuva faci assassinà à Gaffori. Una volta di più, l'avvinimentu produci l'effettu cuntrariu à quiddu aspittatu è a cuisioni trà l'insurretti, in a cunsulta di Corti, si ni trova rinforzata. È puri, a rivolta ferma senza appoghju.

Duranti dui anni, Clemente, u fiddolu maiori di Ghjacintu Paoli, si ni stà à u so capu.



## Di vultata in Corsica

**1755** Clemente chjama à u so frateddu Pasquale in esiliu à Napuli. Mentri ch'iddu si appronta à pidà u capu di l'insurrizzioni, Paoli appronta dighjà u schema di l'istituzioni che li parini i più adatti ad assicurà a libartà di l'isula..

**U 21-22 d'aprili** Cunsulta di Caccia, venini pricisati i principii di u funziunamentu di a custituzioni di u Statu corsu.

**U 14 di luddu Cunsulta di Casabianca.** Dopu ad anni è anni di risistenza sputica è di guerra civili, Pasquale Paoli hè elettu Ghjinirali di a nazioni corsa, dopu ad avè scunfittu l'altu candidatu, Mario-Emmanuele Matra. Diventa u capu di l'isula è principighja à stallà un Statu indipendenti.

**U 18 di novembri Cunsulta di Corti. A Custituzioni,** scritta in talianu, organizighja l'istituzioni di a Repubblica Corsa, pruclamata à u stessu mumentu. Iniziata da Paoli, c'era statu prima un testu vutatu in Orezza, in u 1735, quandu l'indipendenza di l'isula era stata pruclamata pà a prima volta.

---

## 1755

**Consulta di Casabianca.** Pasquale Paoli hè elettu Ghjinirali di a nazioni corsa. Diventa u capu di l'isula è principighja à stallà un Statu indipendenti.

---

## A so opara

**1760 - di frivaghju** A stamperia naziunali si stalla in u conventu di Camporolu.  
**1761** Prughjettu di fundazioni d'un portu in L'isula.  
**1762** A muneta - a zecca - hè battuta in a Casa Barbaggi, in Muratu.  
**1764** A stamparia naziunali hè trasfirita in Corti.

**1764-65** Fundazioni di l'Università di Corti, prima istituzioni d'insignamentu supariori in l'isula. Paoli hè cunvintu chì l'aducazioni hè essenziali pà u sviluppu di a Corsica. St'università avia da furnà un'elitu intillituali corsa capaci di guvernà è di difenda l'intaressi di a nazioni.

Paoli circa di prumova una identità naziunali corsa forti, cù u scopu d'uniscia i Corsi in ghjiru à una identità cumuna, distinta da quidda di i Ghjinuvesi o d'altri putenzi stranieri.

A stessa annata, James Boswell, autori di u più famosu ritrattu di Paoli, sbarca in Centuri.

# RIVOLTA CONTRU À A FRANCISATA

---

## 1807

---

**U 5 di frivaghju** Paoli si spinghj in Londra, ultimu locu di u so esiliu, ed hè intarratu in u campu santu di San Pancraziu.

---

**1769 - l'8 è u 9 di maghju**

**Battaglia di Ponte Novu.**

I truppi corsi sò sfatti da i truppi francesi.

**U 13 di ghjunghju** Paoli

s'imbarca in Portivechju par Livornu cù 300 partigiani è si ni sfughji in esiliu versu Londra.

**1789 - u 30 di nuvembri**

U dicretu chì unisci ufficialmente a Corsica à a Francia com'è dipartimentu hè vistu da certi com'è una opportunità d'integrà i valori ripubblicani, puri mantinindu una certa autunumia isulana.

**1790 - u 3 d'aprili** Paoli

hè invitatu da l'Assemblea Naziunali à vultà in Corsica dopu à più di 20 anni d'esiliu in Gran Brittagna. Ghjunghji in Francia è faci un ghjiru triunfali.

**U 14 di luddu** Quandu Paoli si ni volta in Corsica, a Francia hè in piena Rivuluzioni. L'ideali di **libertà, ugualità è fratiddanza** ribombani forti cù l'aspirazioni d'indipendenza di i Corsi.



**1768 - di luddu** À a seguita di u **Trattatu di Versailles**, a Francia caccia à Ghjenuva i so diritti nant'à l'isula. À principiu, si tratta solu d'una delegazioni induva a Francia hè incaricata di amministrà a Corsica durante deci anni è di pacificà la. Deci anni dopu, Ghjenuva, sempri incapaci di rimbursà i so debiti, l'isula diventa prupietà francese.

**U 15 d'austu** Luigi XV

pruclamighja ufficialmente l'addunata di a Corsica cù a Francia. È puri, l'insuretti resistini sicondu a risuluzioni aduttata durante a cunsulta di Corti u 22 di maghju.

**D'uttrovi** I truppi francesi sò scunfitti durante a **battaglia di Borgu**.

## Rumpitura

**1793** I divisioni crescini trà i partigiani d'una Corsica più autonuma sott'à a prutizzioni di a Francia è quiddi chì sò à prò d'una intigrazioni più completa in u ghjiru di a Ripubblica. Paoli, uppunindu si à i Ghjacubini è à a so cintralizzazioni di u puteri, principi-gghja à perda u sustegnu di u governu francese.

Dicidighja tandu d'entra in cuntattu cù a Gran Brittagna è cuntribuisci cussì à a creazioni di u Regnu anglucorsu (da u 1794 à u 1796), ma sta indipendenza ùn dura tantu.

**1795** Paoli lascia l'isula par u sempri è si ni va pà u so ultimu esiliu.

**1807** Si spinghj in Londra à l'ità di 81 annu ed hè sipoltu in u campu santu di San Pancraziu. I so cennari sarani rimpatriati in a so casa nativa di Merusaglia, oghji trasfurmata in museu.

**“L'ugualità  
ùn devi micca  
essa una parolla  
biota”**

# UNIPOCHI DI DATI CHJAVI

**1725**

**U 6 d'aprili** Pasquale Paoli nasci in Stretta, in a cumuna di Merusaglia. Hè u più ghjovanu di i fiddoli di Ghjacintu Paoli è di Dionisia Valentini.

**1739**

Esiliu in Napuli, dopu à u fiascu di a rivolta contr'à a duminazioni ghjnuvesa. U ghjovanu Paoli si ritrova immersu in un mondu induva l'idei di i Lumi cumenciani à sparghja si.

**1755**

**U 14 di luddu** Cunsulta di Casabianca. Pasquale Paoli hè elettu **Ghjinirali di a nazioni corsa** è si metti à travaddà par stallà un Statu indipendenti.

**1755-65**

**Custituzioni** (1755)  
Stamparia Naziunali in Campuloru (1760)  
Portu di l'Isula (1761)  
Muneta "A Zecca" (1762)  
Stamparia Naziunali trasfiritu in Corti (1764)  
**Università di Corti** (1765)

**1768-69**

**Di luddu di u 1768** Trattatu di Versailles : a Francia ricu-parighja i diritti di Ghjenuva nant'à l'isula.  
**L'8 è u 9 di maghju di u 1769** Scunfitta di Ponte Novu.  
**U 13 di ghjugnu** Paoli s'esi-lighja in Londra.

**1790**

**U 14 di luddu** Vultata di Paoli in Corsica, mentri chì a Francia hè in piena Rivuluzioni. L'ideali di libertà, ugualità è fratiddanza ribombani cù l'aspirazioni di i Corsi.

**1794-95**

Pruclamazioni di u Regnu anglucorsu. Paoli hè presidenti di u Parlamentu corsu.  
**1795** Novu è ultimu esiliu in Gran Brittagna, dopu à a nova occupazioni di l'isula da a Francia.



**1807**

**U 5 di frivaghju** Si spinghji Paoli in Londra à l'ità di 81 anni ed hè sipoltu in u cimiteriu di St Pancras.